

172

C

32

52

472

C32

Jan 12 B

WESSELII ALBERTI VAN HENGEL

472 (32)

O R A T I O

DE

ELEMENTIS DISCIPLINAE THEOLOGICAE
BENE AC DILIGENTER
PERTRACTANDIS.

PUBLICE HABITA

DIE XXVIII DECEMBRIS MDCCCXV.

C U M

ORDINARIAM THEOLOGIAE IN AETHENAE
FRISIACO PROFESSIONEM
SOLENNI RITU AUSPICARETUR.

LEOVARDIAE,
Apud J. W. BROUWER,
MDCCCXVI.



WESSELII ALBERTI VAN HENGEL

O R A T I O

DE

ELEMENTIS DISCIPLINAE THEOLOGICAE
BENE AC DILIGENTER PERTRACTANDIS.

GUBERNATOR FRISIAE ILLUSTRISIME!

ATHENAEI FRISIACI CURATORES NOBILISSIMI!

QUI EX ORDINUM DEPUTATIS AD HAEC NOSTRA SO-
LENNIA CONCELEBRANDA DELEGATI ESTIS,
VIRI AMPLISSIMI!

RECTOR MAGNIFICE, PROFESSOR HONORARIE,
CETERIQUE QUARUMVIS DOCTRINARUM PROFES-
SORES, VIRI CLARISSIMI!

URBIS FRANEQUERANAE MAGISTRATUS, VIRI SPEC-
TATISSIMI!

SACRARUM LITERARUM INTERPRETES HONORA-
TISSIMI!

A

AR-

ARTIUM ET DISCIPLINARUM DOCTORES ERUDITISSIMI!

QUOTQUOT ADESTIS, CIVES, HOSPITES, SUO QUIQUE LOCO ET DIGNITATE CONSPICUI!

PRAESTANTISSIMI DENIQUE JUVENES, PATRIAE SPES, ATHENAEI ORNAMENTUM, NOSTER AMOR ATQUE DELICIAE!



Quod Veteres pariter ac recentiores tradunt Philosophi, nulla esse in his terrarum regionibus divini numinis dona, quae nos mortales ab omni parte beatos efficiant, id ego quoque hisce diebus perspicue intellexi. Allato enim mihi nuncio, me **Regis** augustissimi benevolentia Theologiae Profesorem in hoc Athenaeo designatum esse; meam quidem gratulabar fortunam, gaudioque, supra quam dici potest, perfundebar; suborta vero mox novi prorsus et ardui, quem mihi imponi sentiebam, laboris cogitatio animum tantopere exercuit ac vexavit, ut abesset parum, quin me honorum mihi praestitorum

torum poeniteret. Nec quidquam tamen me magis sollicitavit, quam cura orationis, brevi habendae, quae si spem auditorum et expectationem omnino falleret, suscepti muneris triste foret atque infaustum omen. Nempe dicendum erat de suggestu, quem maximorum ab aevo virorum eloquentia immortalitati consecraverat. Dicendum erat adstante doctissimorum hominum corona, nec modo adstante, sed patres quoque avosque, tanquam e mortuis, testes excitante. Pro tali autem concione dicturus eram ego, quem per duodecim, et quod excurreret, annos ab literarum cultoribus fere semotum, una rusticorum hominum institutio occupasset. Et id mihi proponere debebam dicendi argumentum, non quod in triviis vulgatum esset, aut unis Theologis cognitum atque auditum, sed quod, et meam quidem ingenii haudquaquam superaret exiguitatem, et persona tamen mea ac munere satis dignum iudicatum iri praeviderem. In tales igitur tantasque compulsus angustias, quo tandem modo me expedirem, dubius utique haerebam: sed erat aliquid amplectendum, nec interponenda mora. Dicere igitur constitui *de Elementis disciplinae Theologicae bene ac diligenter pertractandis.*

A 2

Quod

Quod quum hodie aggrediar; utinam id vobis auditoribus ita peragam, ut intelligenti vestro iudicio non omnino videar causa cecidisse! AEquis, obsecro, vos ac placidis favete auribus! Vultu vos oculisque annuite, vos, si vel plausum ferre mihi non contingat, tenuitati tamen meae humanitate vestra veniam esse daturos.

Elementa Disciplinae Theologicae quatenam sint, post doctrinarum scholas sapienti Regis consilio instauratas, non attinet disputare. Tria igitur sumimus nostrae Disciplinae Elementa: *Hermeneuticam sacram, Historiam Ecclesiasticam, Theologiam Naturalem*. Haec autem ab unoquoque, qui ad eruditionis theologiae laudem adspirare velit, bene ac diligenter pertractanda esse, nemo intelligentium negare sustineat. At sunt tamen haud pauci, qui, placentes scilicet Vulgo, vel ignaviam suam pro rerum trutina habentes, in alias partes vergant. Pars igitur contendunt, religionis doctori levem horum Elementorum scientiam sufficere; systematis modo, quod dicunt, theologici decreta memoria comprehendat, atque aliqua insuper Oratiuncularum sacrarum conscribendarum potitus sit facultate. Multo pejus alii, accurata doctrinarum

narum

narum studia tristibus, ut ajunt, ludimagistris relinquentes, in iis unice rebus curam ponunt ac diligentiam, quas splendido nomine *Populares* vocant. Haec nimirum, haec est hujus aevi, clari ceteroquin atque illustris, perversitas et pene dementia, omnibus bonis detestanda, ut ii, quibus ad antiquam eruditionis laudem pateat aditus, a regia tamen studiorum via deflectentes, per diverticula oberrare ament, ac tralatitia rerum cognitione puerorum more gloriari. Serpit, A. A. serpit hocce Malum, non per Galliam solum et Germaniam, ubi haud pauca opinionum monstra gigni videmus, sed per nostram, cheu! Patriam, perfectae olim doctrinae matrem atque nutricem. Serpit utique viperarum astu, per domos, per scholas, per sanctas Musarum sedes; juvenum plurimorum pectora corrumpens, neque eos, qui ad augustissimae religionis patrocinium accinguntur, vanitatis et segnitiei veneno inficere formidans. Vestrum, Juvenes! ne id inficiat, adeoque perdat animum, averruncet optimum, maximum Dei numen! At vos tamen A. A. monitorem me ferte et medicum, aliquam malo, sicubi lateat, curationem admoventem. Diligentem trium Disciplinae theologicae ele-

mentorū pertractationem his potissimum de causis commendabo: Primum, *quod eorum singula utilem per se ac jucundam homini suppeditant exercitationem*: Deinde, *quod sedulo unius Elementi studio cetera insigniter illustrantur*: denique, *quod accurata eorum omnium cognitio ad altiores doctrinas bene addiscendas quasi manu ducit*.

Primo igitur *utilem per se et jucundam praebet exercitationem Hermeneutica sacra*. Hermeneuticam dicimus, auctore ERMENESTIO, eam disciplinam, quae rationem tradit sententiae quorumque verborum subtiliter et inveniendae et explicandae. (a) Quemadmodum autem hac unice Duce intelligi possunt veterum ac recentiorum libri, sic etiam utriusque Foederis sacri volumina: utpote humanum opus, sub Dei quidem auspicio, sed vulgari tamen hominum sermone scriptum atque compositum. Fateor, antequam in disciplinae formam reducta erat Hermeneutica, boni existerent sacrae scripturae Interpretes; sed haud magno illi numero, nec cum Posterorum plurimis comparandi: ORIGENEM dico, HIERONYMUM, CHRYSOSTOMUM, paucos alios: qui vero, si vel posteritas palmam praeripuiscent interpretando; Hermeneutices tamen
uti-

utilitatem exemplo suo non magis infregissent, quam faceret ad Rhetoricen aut Poëticen spernendam HOMERI laus et DEMOSTHENIS. (b) Nostro inprimis tempore, quisquis sacrae scripturae sensum recte intelligere cupiat, hanc disciplinam non primoribus gustare labris, sed penitus imbibere, inque succum debet et sanguinem convertere. Jubet hanc studii diligentiam adhibere nonnullorum, KANTII placita mentientium, levitas. (c) Jubent aliorum proterva adversus sacrae scripturae divinitatem molimina. Labor autem, in eluendam hanc errorum contagionem infusus, neutiquam ingratus est. Ingratum dico? — Immo jucundissima est ea Hermeneutices tractatio, qua tantum abest, ut non nisi scholarum praecepta memoriae infigantur, ut ipsi illa sanctissimi Veteris Novique Foederis libri assidue illustrentur. Illustratur igitur sententiosum illud Orientalem et sublime dicendi genus, cujus veneres lectori nunquam satietatem creant. Discutiuntur tenebrae codicis illius longe antiquissimi, qui omnium unus religionem homine dignam patefecit. Iis familiares reddimur viris, qui, cum foedis superstitionibus obstrictae erant, et Graecia, et Roma, et cunctae terrarum gentes, quamquam obscuro loco nati, rectum tamen ad

astra

astra iter mortalibus monstrarunt. Hos igitur, quae mandaverat Deus, emortua lingua loquentes audimus. Cum hisce per deferta loca, per varios regionum tractus peregrinamur, principesque videmus ac reges eorum oracula contrementes. Horum novo gaudemus et etiamnum commovemur cantu, qui feros olim et saxa in homines commutavit. (d) Dulce profecto est cum HOMERO vivere; at multo dulcius divinorum vatum familiaritate frui. Evanuisse tunc videtur sequioris aevi labes, vetustorumque Dei cultorum non memoria servata, sed probitas et fides restituta.

Eundem usum ac jucunditatem habet Historiae Ecclesiasticae exercitium. Videlicet orditur ea ab humanarum rerum incunabulis, tanquam ab aquarum fonte, unde fluvii ingentes sexcentique rivi rivulique enascuntur. Hinc progrediens, spectatori monstrat, quae per quadraginta circiter secula tum Patriarchae, tum Israëlitaes gesserunt, quaeque iis acciderunt fausta atque infausta. Animadverti potissimum jubet admirabilem divini cultus emendationem, sensim sensimque monitore Deo factam: Judaeos tamen identidem notans, utpote a majorum religione et virtute magis magisque

que degenerantes. Tum vero natum docet, non unius gentis, sed generis humani Servatorem: atque animo jam renovato nova miracula narrat. Mox Christo cruci affixo, vastatisque Hierosolymis, scena decedunt Judaei. Prodit altera coelorum progenies, Christiani; quorum et pietatem miramur ac virtutem, nec non foecundissimam propagationem. Laudamus igitur Deum, tam sanctae beataeque stirpis patrem. At paulatim in varias eos videmus divelli familias. Hinc lites, hinc vexationes mutuae, hinc, post Romani imperii interitum, validiore secta ceteras perpetuo opprimente, corruptisque identidem Christianorum moribus, teterrima tandem barbaries orbi illata. Hanc, Deum immortalem! quis non acerbe deploret? At statim subvenit Historia, sacrorumque proponens instaurationem, lacrymas abstergit. Namque et ingeniorum cultus quam prospere inde provenerit, accurate refert, et flectendis oculis ad laetissimam, qua nostra tempora patriis saltem in regionibus gaudent, rerum faciem, omnes bonos mirum in modum delectat. Talia ac tanta, quae Historia Ecclesiastica late tradit, parvula quasi tabella descripsi, ut studium ejus tam utile

B

esfc

esse, quam jucundum, vos A. A. ipsi videretis. Qua de re tamen si vobis nondum persuasum sit, cavete, ne me, incultae hujus descriptionis auctorem, mittentes, ipsam illam Historiam culpetis. Etenim laudem, qua universalis ab aevo ornatur Historia, haec quoque, eodem, dicam, an majori? jure sibi vindicat. Haec mentem coelesti lumine ultra fabulosa illa transfert tempora, quae cuncti terrarum orbis populi fomniarunt. Hujus studium, quo sanctius et augustius ejus est argumentum, eo acriores nobis admoveat stimulos, ut vitam moresque bene dirigamus. Quisquis autem sectarum Christianarum, earum maxime, quae nobiscum vivant, cognoscere cupiat origines, ad hanc quoque magistram discipulus accedat: hanc praeceuntem sequens ad antiquitatis secreta penetrare annitatur: opinionum ibi natales, incrementa, procreationes exploret summamque sibi capiat inde voluptatem.

Atque ejusmodi *voluptas quam arte sit in Theologiae etiam Naturalis exercitatione cum utilitate conjuncta*, nescio fane, quomodo pro re dicam. Est Theologia Naturalis doctrinarum complexio, quas solius rationis ope ex rerum
cres-

creatarum consideratione possumus colligere. Simul atque enim, sive hunc adspectabilem contemplemur mundum, sive aetheream animorum vim ac vigorem meditemur; statim sese nobis sapientissimi Numinis ita manifestat providentia, ut, quotquot de meliori luto facti simus, ad religionem nobis informandam sponte ducamur. Atque haec est, ut jam veteres animadvertisse reperimus (e), non praecipua alicujus gentis aut societatis fortuna, sed cunctis mortalibus communis ac veluti innata pietas, cujus usque quaque apparent vestigia, quam primum seriis ii de rebus incipiant cogitare. Quam eximios autem Naturalis Theologiae exercitium, ad scholae leges rite compositum, quamque uberes homini afferat fructus, ex eo abunde colligi potest, quod, quidquid est religionis, hac Theologia tanquam fundamento nititur. Haec porro Physicæ, Astronomiam, aliasque doctrinas sibi in auxilium vocans, ad earum quoque disquisitionem solertiores impellit. Pars igitur abdita Naturae miracula scrutantur: pars coeli metiuntur sidera: nonnulli, nunc quid inter corpus nostrum et animum intersit, nunc quae sit malorum ac miseriarum causa et origo, vel alia hujus generis expendunt: omnes autem

ingenti eruditionis copia instruuntur. Mores vero quam egregie pia hac naturae contemplatione emolliantur, quam penitus vitiorum sordibus purgetur animus, Deum sibi perpetuo praesentem sistens, res ipsa loquitur. Factum quidem est hoc studium difficilius aliquanto et molestius, quod Philosophi novas in dies excogitabant disputandi formulas. Et plurimum negotii facescit Germaniae illa celebratissima schola, quae primas in Philosophia partes, non excultae rationi, sed meris animi sensibus defert (*f*). At vero, quas prima specie spinas esse putaveris, potius ea laboris, summam cum utilitate jucunditatem afferentis, incitamenta sunt. Fallor enim A. A., aut in Graecorum Romanorumque disciplinis opinionum, quas multi hodie novitatis titulo insigniunt, principia habentur et fontes (*f*^o). At hos ibi quaerere, ibique investigare, non aliter potest, quin unicuique ingenii liberalioris homini in deliciis sit. Translatus autem is ad veteres Philosophiae statores, his maxime adhaeret, horum ab ore pendet, temporisque sui lutulentum sermonem facile obliviscitur. Jam cum SOCRATE, morti proximo, animorum immortalitatem tuetur. Jam PLATONEM

au-

audit de universo hoc, quem adspicimus, mundo, deque aeternis rerum exemplaribus subtiliter disputantem. Jam aureum illum legit Ciceronis *de Deorum Natura* librum, atque sese ex hujus terrae angustiis evolasse credit, superasque attigisse sedes. Athenis, in Tusculano, Romae, ad Siciliae fretum, cum excellentissimi ingenii viris vivit habitatque. Ab his autem ad sublimiora evectus, ipse summum in rerum natura rectorem vestigat, assequitur, admiratur: religionisque argumenta et officiorum causas undecunque colligit. O hominem terque, quaterque beatum! Magna et accurata excolitur doctrina: animo emendatur: virtutis amore perfunditur: coelestium jam his in terris videtur gaudium cumulari.

Suppeditant igitur, si dicendo quid effecerim, Disciplinae Theologicae Elementa tam utilem per se et jucundam exercitationem, ut bene ea ac diligenter pertractanda esse, negare possit nemo. Ex eo autem, quod altera nunc orationis parte probare conabor, *sedulo nempe unius Elementi studio cetera insigniter illustrari*, non minor iis fortasse accedet commendatio.

Et sedulum primo Historiae Ecclesiasticae studium Naturalis Disciplinam Theologiae haud parum illustrat. Multos enim illa nobis ostendit, eosque praestantis nonnunquam ingenii viros, qui, quoniam in Naturalis Theologiae principiis haesitabant, idcirco nec dubitandi modum repperunt, neque errandi finem. Mirari hinc definimus HELVETII, VOLTARII, plurimorum nobis aequalium putidissima de Christiana religione commenta, iidemque excitamur, ut fanæ rationi, inanibus verborum captationibus seclusis, quam firmissime adhaereamus. Atque hoc haud temere. Placeat nempe sibi et applaudat id disputatorum genus, quod, ut ait PLATO, prae sua scilicet sapientia, omnia commiscet, pietatisque fundamenta penitus evertit (g). Ceteris omnibus id sefe jactet melius et prudentius. Sit quoque in novitatis specie dulcedinis aliquid, quod incautos juvenum animos alliciat, transversosque agat. Ast Ecclesiae Historia mutatis docet actoribus eandem plane ludi tragoediam, quae Antiquis jam plus semel lacrymas excusit. His autem, qui potissima religionis Naturalis capita sugillare non erubescunt, MOSEN, DAVIDEM, JESAIAM opponit, cunctosque Dei vates, quorum sunt oracula Servatoris nostri auctoritate probata, posteaque ab optimo

ptimo quoque ac sapientissimo plena animi persuasione accepta. *Nec minora haec Historia Hermeneuticae sacrae praestat officia.* Videlicet Israëlitarum docet, aliarumque gentium facta, opiniones, mores, vitae genus, ut breviter dicam, docet omnia, quae ad Interpretem, ut ajunt, Historicum informandum requiruntur. Ac Graecorum quidem et Romanorum scriptorum quoniam historicum esse Interpretem, necesse est; talis quoque esse debet, qui Sacrae Scripturae explicationem aggrediatur. Sed nolo multus esse in argumento, quod clarissimi nuper Viri fati superque expenderunt (*h*). Paucis hoc addo, Historiam Ecclesiasticam, quatenus Interpretationis etiam fata referat, Sacram Hermeneuticam maximopere juvare. Exponit enim, quam horrenda opinionum monstra, quam turpes morum depravationes, quam tristitia et nefanda rei Christianae damna, per longam seculorum feriẽm, una pepererit, et etiamnum passim pariat germanae Interpretationis negligentia. Absit vero longissime, ut non nisi furdis, quemadmodum in proverbio est, fabulam narret. Audiunt eam, audiunt hoc nostro tempore plurimi, qui rectum sequi cupiunt. Atque hi constanter Allegoricas horrent Mysticasque

que nugae, ac, per omnem vitam in Interpretatione Grammatico-Historica diligentes, de sanctissima religione bene merentur.

Hermeneutices porro sacrae studium magno est usui tam Theologiae Naturali, quam Historiae Ecclesiasticae. At mirum fortasse hoc vobis est A. A. Vestrum fortasse non nemo nescit, quid sibi boni de Hermeneutices ope Theologia possit augurare Naturalis. Tune ergo, inquit, in divino illo codice idem plane contineri putas, quod ratione duce intelligatur? Tune igitur, pro hujus aevi calliditate, Christianum simulans, Christi tamen doctrinam spernis, eique curtam tuam substituis supellectilem? Ne nimis, quae so, indignemini A. A! Sacrae Scripturae argumentum duabus partibus absolvitur, primum doctrinis, quibus revelandis nobis gratum fecit Deus; deinde rationis humanae decretis, quae sacri scriptores non invito Deo proposuerunt, explicuerunt, confirmaverunt, adversus ea, quae objiciebantur, defenderunt. Atque haec rationis decreta quam scite isti et eleganter lectoribus suis exhibuerint, cum quisque vel me tacente videat; apparet quoque, quanti sit, horum virorum mentem bene intelligere; qualesque propterea Hermeneu-

neuticae ad Theologiam Naturalem illustrandam tribui debeant partes. Multo minus Hermeneutices hujus auxilio carere potest Historia Ecclesiastica. Ad hanc enim Historiam conscribendam Patrum, uti dicuntur, Ecclesiasticorum scripta materiae copiam praebent. Haec vero sunt similia silvae, ubi licet flores legere, perque arborum tractus hilare obambulare; sed ubi caute tamen et considerate versandum est, ne per ignotos calles inopinate ad avia deducaris, ferarum latibula, nec sine vitae discrimine effugienda. Talibus in locis quanti pretii peregrinatoribus dux est, diligenter cavens, ne a consueto hi deflectant tramite, tanti profecto nobis est in Patrum lectione Hermeneutica sacra. Hac nempe duce, quemadmodum CICERONIS verba ex PLATONE, sic ex Veteri Novoque Foedere multa Patrum explicantur dicta, quae vel iisdem, vel mutatis vocibus ab Auctoribus sacris sunt mutuati. Eadem duce, quod ab hisce Patribus bene perspectum atque enodatum, adeoque haud dubitanter amplectendum est, a crebris eorum erroribus fatis perspicue distinguere docemur. Quo autem quis sit Hermeneutices peritior, eo certius errorum reperiet causas, eoque ma-

gis ad eos refellendos paratus erit atque instructus. Docuit hoc suo exemplo illud Patriae decus, HUGO GROTIUS. Hoc nuper comprobavere ERNESTIUS, SEMLERUS, MORUS, iisque pares eruditione viri, qui, liberali Sacrae Scripturae Interpretatione a Patrum argutiis revocanda, monumentum sibi posuerunt aere perennius (i).

De luce, quae ex Theologiae Naturalis studio Historiae Ecclesiasticae et Hermeneuticae Sacrae oritur, age nunc A. A. vestra pace nonnulla adjiciam. Et primo ad Historiae Ecclesiasticae intelligentiam utilissimum est, Theologiam Naturalem bene perspectam habere: quippe quae non solum acuit ingenium, sed et animum praeparat ad res gestas, remota omni praejudicata opinione, religiose investigandas. Praeterea, hac instructi scientia, de Conciliorum statutis subtilius judicabimus: et crebro accidet ut, quod damnaverit Monachorum inscitia, nos probemus: contra vero longissime saepe rejiciamus, quae omnium olim plausu accepta sint. Singularis porro in tractandis libris eorum Ecclesiae Patrum, qui ad suae Philosophiae placita religionis doctrinam torserunt, Theologiae Naturalis usus est: ne scilicet
il-

illorum exemplo luxuriantis ingenii commenta cum sanæ rationis veritate confundamus. Quam insigne autem in accurata hujus Theologiae cognitione Hermeneutices studio positum sit adjumentum, nescio plane, quomodo pro rei dignitate dicam. Quibuscunque enim de divina Naturalis Theologiae origine certo persuasum est, nullam ii Interpretationis patiuntur legem, rationi repugnantem. At simul, quo magis Rationem suo momento ponderant, quo majoris eos Sacram aestimare Scripturam, quoque ejus divinitatem modestius venerari, necesse est. Sicuti ergo in puerorum scholis, si quis magistri munere rite fungitur, discipuli cum assidue amant, in oculis ferunt, ejusque tanquam ab ore pendent; sic prudentes isti rerum existimatores Sacri Codicis disciplinae sese ultro tradunt, ejusque auctoritatem studiose sequuntur. Hinc Doctrinae Christianae argumentum exhibitori, ad hunc Codicem continuo concurrunt: hunc unum rogant: huic uni credunt: neque illos audiunt, qui, rationis suae praestantia superbientes, si quid eam superare videatur, audacter id et praecise negant. Hinc quoties ad Hermeneutices instructionem pervenitur, locum

quidem admonendi, quid caveri oporteat, Theologiae dant Naturali; sed interpretandi leges ab una Sacra Scriptura accipiunt. Talis autem tantaque magistra nec fallit eos, neque a veritate abducit, sed brevissimam eo monstrat viam. Hanc igitur ingresfi, magis magisque recta religionis intelligentia ornantur, moribus emendantur, virtute denique ac pietate augentur. Miserandam vero lugent illorum sortem, qui, coelestis magistrae opem aspernati, inextricabilibus sese errorum ac flagitiorum labyrinthis implicuerunt.

Et hoc igitur probare conati sumus, sedulo unius Elementi studio fieri, ut cetera insigniter illustrentur. Tertia, cujus supra mentionem fecimus, causa, cur Elementa ista bene ac diligenter pertractanda sint, in eo posita est, quod *accurata eorum omnium cognitio ad altiores doctrinas bene addiscendas quasi manu ducit*. Quam rem cum postrema nunc orationis nostrae parte demonstrare aggrediamur, eandem A. A. a vobis petimus humanitatem, cujus dicentibus nobis egregium hactenus indicium dedistis.

Altiores doctrinas memorans, eas volo, quarum Institutio-

tionem scholarum leges Academiis attribuunt, *Theologiam* nempe *Christianam*, *Disciplinam Moralem*, *Scientiam Pastoralem et Homileticam*.

Principio igitur tres illae, *Historia Ecclesiastica*, *Hermeneutica Sacra*, *Theologia Naturalis* occurrunt nobis, *Christianae Theologiae officia praestantes*. Occurrunt vero, ut hoc utar simili, non tristi Parcarum vultu horrorem incutientes, sed Charitum comitate et gratia amorem sui ac desiderium cuius excitantes. Neque enim sunt illae Theologorum placitis tam obnoxiae, ut cum servis comparari queant, atrocis herae imperio adstrictis, sed, si paulo disjunctiora componere licet, regalis potius virginis, in qua sit omnium spes defixa, blandas referunt ac voluntarias educatrices. Quemadmodum autem tales singulae suum habent, quod exsequantur, munus; sic doctrinarum illarum alii aliud negotium mandatum est. Et primum quidem, qualis constitui debeat Theologia Christiana, Hermeneutica Sacra docet. Nam non solum ostendit, qua ratione ex Sacro Codice colligamus, quidquid ad religionem omnino pertineat, sed etiam quomodo hoc ab iis, quae divini Auctores, minus ex mente sua, quam pro aevi sui

ingenio locuti sint, prudenter distinguatur. Nec praecipere negligit unquam de purganda Theologia ab omnibus ineptiis, quas male seduli homines, depravatis sanctorum virorum verbis, in eam importarunt. Atque his, similibusque praecptis, a nemine adhuc impune spretis, cum abundet Hermeneutica; Historia Ecclesiastica eorum praestantiam exponit, eorumque pondus auget. Affirmat igitur haec, haud pauca, quae olim Religionis ornamenta viderentur, puerilia esse *Scotistarum* aut *Thomistarum* (*k*) crepundia, hac sane aetate ridenda et abjicienda. Quod dum jubet, revocata mox vetustissimorum Christianorum memoria, quam integra ab initio et simplex fuerit Theologia, patefacit. Subinde vero eam ab adversariis haud infeliciter defendit, manifesta quippe Dei facta, divinam ejus originem declarantia, perque multas aetates continuata, vanae homunculorum suspicioni opponens. Ceterum Theologia Christiana nec pauca Theologiae etiam Naturali debet nec vulgaria. Cum enim sic comparata sit Sacra Scriptura, ut plurima, ad religionem pertinentia, vel obiter modo attingat, vel silentio prorsus praetereat; Theologia Christiana manca existeret et im-

imperfecta, nisi haberet, unde consummaretur. Ista autem Theologia ei praebet Naturalis. Huic suae quoque sunt opes: haec thesauris abundat, quibus Theologiam ornet et amplificet Christianam, eamque ad integritatem et perfectionem perducere conetur. Quod ut Hermeneuticae Sacrae et Historiae Ecclesiasticae auxilio adjuta, tandem aliquando assequatur, Deum Optimum Maximum, oramus et obtestamur.

Disciplina porro Moralis ut bene intelligatur, Elementorum studium eam praecedat, necesse est. Fac enim te, quisquis sis, ab hoc studio imparatum, ad locos venire Morales, haud inepte compareris cum naufrago, in insulam ejecto incognitam et inauditam. Translatum te vides ad studium, tibi oppido novum, teque, quod miserrimum est, adminiculorum, quibus ejus rationem cognoscas, penitus egentem. Multarum insuper eges rerum notitia, quae tibi, hoc in studio qualicunque tandem modo versanti, utilius id ac jucundius facere potuisset. Et quoniam omnes Moralis Disciplinae doctores, in quoslibet forte fortuna incideris, pro rectae viae habes indicibus; cum inficiis saepe nunc huc vagaris, nunc aliorum: neque est fere, ubi errandi
finem

finem reperias. At vero quisquis, antequam ad Disciplinam Moralem accedit, Elementis sese exercuit Theologicis; transgreditur is veluti e patria in contiguam regionem, ubi post breve tempus, nec locorum erit ignarus, neque expers praemiorum, quae illic industriam et laborem manent. Una nimirum nos conformat Hermeneutica ad congerendam ex Sacro Codice universam materiem, ex qua Disciplina Moralis construatur. Nec segnius id curat, ut, quae sancti viri suis dixerint locis, aetatibus, hominibus; a divinis illis discernamus agendi legibus, quae nunquam debeant antiquari, sed perpetuo fervari. Quandoquidem autem haec leges in Sacra Scriptura sub gnomarum saepe latent et proverbiorum involucris; magni haec distinctio ponderis est: estque longe sane majoris in re Morali, quam in Theologia Christiana. Theologia autem Naturalis qualia suppeditet et quanta ad Disciplinam Moralem amplificandam, limandam, confirmandam, unus suo exemplo declaravit REINHARDUS, Germaniae illud ornamentum, quod ex oculis nuper sublatum quaerimus (1). Historiam denique quod attinet Ecclesiasticam, non solum ea frequenti docet rerum eventu, quam arcte cum salute societatis

cietatis recta morum Disciplina copulata sit, sed quemque, in hujus Disciplinae studio versantem, ad prudentiam excitat et cautionem. Patrum enim proponens crebros in locis moralibus errores, studiosos sui adhortatur, ut, quod LIVIUS *foedum* appellat *inceptu*, *foedumque exitu*, prudenter vitent (*m*). Atque hinc BARBEYRACII (*n*), similibusque virorum existunt aemulatores, superstitioni semper adversantes, at veritatis et virtutis vindices acerrimi.

Ad finem vergit Oratio. Quemadmodum universa Theologorum Disciplina, si res recte reputetur, hoc habet consilium, ut boni informetur Christianorum Doctores; quemadmodum igitur omnia tandem *in scientiam* quasi conflunt *Pastoralem et Homileticam*; sic et eo tendit *Elementorum Institutio*. Historia igitur Ecclesiastica tantum absit, ut nuda nobis enumeret Orthodoxorum, qui vocantur, et Haereticorum nomina aut fata, ut potius eorum facta articulatim exponat, cumque factorum memoria, ut modo significavimus, causarum atque effectuum relationem sapienter conjungat. Fit igitur ejus studium, quod appellant, *Praematicum*, quodque omnis Historiae studium fieri, POLYBIUS,

D

Cr-

CICERO aliique iusti rerum iudices voluerunt (o). Hanc proinde sibi Magistrum fumant ingenui Juvenes, qui, ubi posthac erunt ad sacrorum Oratorum numerum adscripti, vulgo nolint inflammare animos, sed irarum flammam extinguere. Ad hanc accedat, qui in monendo olim et castigando non vage versari cupiat, sed hoc officio ita fungi, ut nec desit spes peccantes corrigendi, neque haec facile frustretur. Hermeneuticae autem sacrae praeceptis si qui Theologiae studiosi obsequuntur; non ii docendis rebus, quae vetustiori erant aevae accommodatae, turbabunt auditores; neque, orationes suas obscurioribus Orientalium dictis onerantes, canoras nugas pro elegantia venditabunt; neque in explicandis denique sanctorum virorum effatis ridiculos pro concione agent syllabarum aucupes; sed docti atque disertae Sacrae Scripturae Interpretes, et dicentur, et dici merebuntur. Ac licet alii, pro mirabili sua inscitia et cupiditate, doctoris Christiani munus antiquo Israelitarum assimilantes sacerdotio, hujus quoque sibi jura arrogent, seseque erga universam hominum societatem stolidè satis et insolenter gerant; hi tamen, muneri suo suum statuentes pretium, tum
pro-

probos se semper praeſtabunt homines et cives, tum vero modeſtiſſimos Religionis patronos. Ceterum Theologia etiam Naturalis Doctoribus Chriſtianiſ, quo delirantium mentes ad ſanitatē reducant, haud pauca indicat remedia, ſacriſque eorum orationibus inſignem rerum praebet copiam. Quid dico? Locos ea oratori aeque atque auditoribus aperit vere amoeniſſimos. Hic ſunt quaſi prata, uberrimo rore virentia. Hic fontes caſtiſſimae voluptatis aeternum manant. Hic ducitur mens humana ad auguſtiſſimum illud naturae ſpectaculum, ubi gaudet, exſultat, tripudiat, quidquid vitae luce fruitur. Adeſte huc, quotquot orationibus veſtris, ut et vobis, et aliis quam utiliſſimae ſint, vim ac lumen exoptatis! Hic vos excurrite! Hic exſpientur omnes, qui veſtrae curae commiſſi ſunt! Videant, quae hic ubique proſtant, veſtigia Dei! Audiant Dei laudes, quae cunctorum celebrantur ore! Tanto Dei amore incendantur, ut tendant ad id, quo mortales ſumme beatos fieri, inclytus Dei filius verbis factisque fidem dedit, ut diſcant igitur, Deum imitari.

Atque ſic peracto conſilio hinc deſcenderem, niſi aliud moneret feſtus hiece dies, meoque mihi natali dulcior.

D 2

Et

Et primum quidem monet, ut vos salutem, Nobilissimi Viri, hujus Athenaei Curatores! Quam grata autem temporis, meam erga vos observantiam testificandi, mihi accidat opportunitas, vix ac ne vix quidem dicere possum. Nimirum quamvis Regis munificentia, quae me ad hunc amplissimum Profesforum ordinem vocabat, haud mediocri me affecit gaudio; id tamen, simul atque ad me perlatum erat, vos, tam clari nominis viros; hujus Athenaei esse curatores designatos, maximopere auctum est. Utique vero vos jam satis superque significastis, quam vehementer sibi hoc Athenacum de vestro in se studio gratulari debeat, quantaque ego de vestro favore mihi audeam sperare. Qua propter hoc mihi concedite, Viri Nobilissimi! ut me meosque data hac occasione ac summa cum reverentia vobis commendem. Quidquid in me sit ingenii aut doctrinae, nihil equidem antiquius ducam, quam ut conferam illud ad munus, mihi delatum, religiose exsequendum. Ingenii autem mei et doctrinae exiguitatem, quam non simulate, sed ex animo profiteor, laboris certe et exercitii assiduitate pro viribus meis compensare conabor. Vobis vero, Nobilissimi

Vi-

Viri ! quod ad hujus Athenaei gloriam, publicamque salutem augendam suscipiatis, ratum id omne faustumque faciat Deus; isque beneficiorum copia, tum in vos, tum in vestros omnes collatorum, virtutem vestram remuneretur!

Vos ut silentio praetermittam, Clarissimi Viri, quarumvis Doctrinarum Profesores! nec fert mos majorum, nec vestra dignitas, neque animi grati conscientia. Tanta profecto me tenuit vestri nominis reverentia, ut me fere puderet, me, novum quippe hominem, huic splendidissimo ordini adscriptum esse. At vestrum plurimi, simulatque eos nuper, vel Amstelodami, vel hac in urbe invisebam, comitate me complexi sunt plane singulari. Hospitio me, et tunc, et nunc iterum excepit senex aetate, virtute, meritis maxime venerandus, WASSENBERGHIVS. Vos vero, quorum in visum adspectumque hisce demum venio diebus, id omnino mihi praestatis benevolentiae, quod, si vos antea invisere mihi licuisset, jam tunc mihi haud dubie praestitissetis. Hoc recreavit animum. Hoc sollicitudinem in laetissimam vestrae familiaritatis spem commutavit. Ad hanc igitur spem erectus, et apud vos habitatum veni, et vestrae hodie humanitati ab hoc suggestu

me committo. Me vestrum, Viri Clarissimi! accipite focium, amicum, eundemque haud raro discipulum. Meis favete studiis: et, si quid erravero, placide corrigit! Omnibus ego contendam nervis, ut vobis gratum faciam, utque memet vestra amicitia non prorsus exhibeam indignum. Faxit Deus, vos, Viri Clarissimi! mihi ita viam ad altiora praeceatis, ego autem vestra vestigia tam continenter premam, ut confociatis viribus, et multos disciplinae nostrae alumnos ad praeclaram rarae eruditionis ac virtutis laudem perducamus, et, magnam huic Athenaeo gloriam comparantes, viderem illam Academiam Francueranam ex ruinis suis restituisse videamur!

Talis ardens tantaeque gloriae cupiditate, ad vos venio, vos compello, Praestantissimi Juvenes, qui, ut literis exerceremini, ad hoc Athenaeum convenistis! Eadem honestissimae gloriae vos velim omnes cupiditate inflammare. Vobis autem, quotquot vestrum sese meam in disciplinam tradituri sunt, me offero praeceptorem, commodis vestris toto deditum animo atque devotum. Talem me accipite, meisque curis omnia vestra studia committite. Negligentia quidem

et

et ignavia severum me habebit censores; quippe qui ipse laborem, quo et alumniis meis et publicae rei profum, nulla de causa subterfugiam: at strenuis et impigris, ut vel desint ingenii vires, facilis semper ero comisque dux et adjutor. Nec generosis illis animis, qui, nihil sibi arduum putantes, ad verae eruditionis fastigium adspirant, magistrum me exhibebo, muneris dignitate superiorem, sed blandum me praestabo viae comitem, sed amicorum nomine complectar eos et fovebo. Vos mihi igitur, Praestantissimi Juvenes! meisque, quae so! praeceptis morem gerite! Vos vota solvite, Deo, patriae, parentibus facta! Vos denique societatis Christianae spem, in vobis collocatam, explete et superate!



A N N O T A T I O.

Hanc meam Orationem in lucem edenti, visum mihi est, aliquot ei, in Tironum maxime gratiam, adjicere annotatiunculas: quod lectorum neminem segre laturum, spero atque confido.

(a) Vide summi viri *Instit. Interp. N. T. p. 11. ed. IV. Amm. Brevius Hermeneuticam artem sacros libros interpretandi dixit BECK. in Monogramm. Hermeneut. libr. N. T. Part. I. p. 1. Quocum cf. JAHN. Enchirid. Hermeneut. Gener. Tab. V. et N. T. p. 11. Adde, si tanti videtur, quae diximus non ita pridem in Horreo, cui titulus: *Bijdragen tot de Beoefening en geschiedenis der Godgeleerde Wetenschappen*. Tom. I. p. 146. s. s.*

(b) ERASMUS etiam, DRUSIUM, GROTIUM laudare potuissim, aliosque, qui, quamvis Hermeneutices disciplinam nequitiam ad scholae legem edocti erant, bonitamen extiterunt librorum divinorum interpretes. Sed norunt omnes, magnos hosce viros a diligenti Græcorum, Romanorumque scriptorum lectione ad sacram scripturam explicandam promptos et paratos accessisse. Et si vel accessissent imparati, quis tamen ad præclara ista ingenia, quae omnia sibi deberent, nostros sequeparet tirones, tardos haud raro et mente inbecillos? Sed re plural Legatur PLANCKII liber utilissimus: *Einführung in die Theologische Wissenschaften*. Tom. II. p. 94. s. s. Mitto alios.

(c) Inprudenter illis, qui *Moralem* quandam sacrae scripturae *Interpretationem* in locum *Interpretationis Grammatico-Historicae* supponi voluerunt, quosque post alios confutavit NOESELLT. in *Exercit. ad S. S. Interp.* p. 275. v. s., temere annumeratur KANTIUS. Vide ejus librum, haud omnino spernendum: *die Religion innerhalb der Grenzen der bloßen Vernunft*. Ed. 2. p. 47, 157, al. cf. et MELLIN. *Encyclopädisches Wörterbuch der kritischen Philosophie*. Tom. I. Part. 1. pag. 423. s. s.

(d) CLEM. Alex. *Admon. ad Gent.* p. 4. Ed. Par. 1641 ὅρα τὸ ἄρα τὸ καὶν, ὅσον ἵσχυται ἀνθρώπους ἐκ λιβάν καὶ ἀνθρώπους ἐκ θεῶν πεποικηκέν. cf. HORATIUS *de Art. Poet.* v. 391-396 ubi Orpheus et Amphionis fabulae narratur.

(e) Cff. CICERO, *de Nat. Deor.* Lib I. 16. II. 4, 16, aliique, quos inter precipue MAXIMUS TYRIUS, *Disert.* XVII. Cap. 5. p. 195. Ed. DAV. Quem locum etiam laudatum video ab H. WITSIO in *Exerc. sacr. in Symb. Apost. et Orat. Dom.* p. 46. Et hac de re recte CLEM. Alex. l. c. p. 45: πᾶν ἀνθρώποις ἐνστάται τις ἀπὸ θεοῦ Σίμψ.

(f) Non

(f) Non ignorabant Viri docti, me SCHELLINGII maxime scholam significare voluisse, cujus Philosophi de religione sententiam, tam alibi, tum in libro: *Philosophie und Religion*, prodiam, post alios examinavit VOGEL. in GABLERI Diario: *Journal für auserlesene Theologische Literatur*. Tom. V. p. 1. s. s., et SÜSKIND. in horreo suo: *Magazin für christliche Dogmatik und Moral*. Fasc. XVII. p. 1. s. s. Huic quidem SCHELLINGIUS sese respondurum esse, promissit in Museo suo, cui titulum fecit: *Allgemeine Zeitschrift von Deutschen für Deutsche*. Tom. I. Part. 1. p. 98: ut fidem, quantum scio, nondum liberavi.

(f*) Sic v. c. SCHELLINGIUM non solum ex SPINOSAE Disciplina, sed ex placitis Neo-Platoniorum quam plurima petiisse, veteram lectio aperte docet. Idem est iudicium STÄUDLINI in *Lehrbuch der Dogmatik und Dogmengeschichte* Ed. 3. pag. 34. et 172.

(g) PLATO *Opp. T. I. p. 101. E. ed. SERR.* ἰκανὶ γὰρ, ἢ πρὸς κοφίαν ἐμποῦ πάντα κινεῖσθαι, ἤτοι δύναισθαι αὐτοῖς αὐτοῖς ἀφικεῖσθαι.

(h) Legantur V.V. D.D., quos laudavi in Dissertatione *de recta Novi Foederis Interpretandi Ratione*, quae inserta est *Opp. Societ. Teyler. Theol.* Tom. XXVII. p. 80. s. s. Addatur in primis KEILLI Disputatio in libro, quem conjunctim edit cum TZACHNERO: *Analekten für das Studium der exegetischen und Systematischen Theologie*. Tom. I. Part. 2. p. 47. s. s. Cf. tamen, quae opposuit STÄUDLIN. in Diario, quod vulgant AMMON et BERTHOLDT sub titulo: *Kritisches Journal der neuesten theologischen Literatur*. T. I. Part. 4. p. 321. s. s. T. II. Part. 1. P. 1. s. s. et Part. 2. p. 113. s. s.

(i) Quanto Iure verba HORATHI *Carm. Lib. III. Od. 30.* hos in viros transfulerim, doceat NORRELLI Narratio de SUMERO ejusque ingenio inprimis et meritis in Interpretationem S. S.; BECKII Recitatio de S. F. N. MORO; et VOORSTII, Praeceptio-
ris mei acutissimi Oratio de JOANNE AUGUSTO ERNESTIO, optimo post HUGONEM GROTIUM, Duce et Magistro Interpretum Novi Foederis. De GROTH meritis legatur praeter alios SEGARI Oratio de HUGONE GROTHO, illustri humanorum et divinarum Novi Foederis scriptorum Interprete.

(k) De Sectis haece, quarum haec THOMAE Aquinatis, illa vero JOANNIS DUNS scoti, habet nomen, legantur Historiae Ecclesiasticae scriptores, ut v. c. MOSHEMIUS, *Institution. Hist. Eccles.* p. 594. VENEMA, *Histor. Eccles. Christ.* Tom. VI. p. 336. s. s. SCHRÖCKIUS, *Christliche Kirchengeschichte*. Tom. XXIX. Alii.

(l) Meum in rem verti iterum HORATHI verba, *Carm. Lib. III. Od. 24.* Nec levi putem de causa. Nam quantum Disciplina Moralis REINHARDO debeat, testium est omnibus, qui praecclarum ejus opus: *System der Christlichen Moral*, cujus nuperrime exire coepit quinta editio, tritum habent et usitatum.

(m) Egregie LIVIUS, *Hist. Praef.* Tom. 1. p. 4 ed. ERN: Hoc illud est praecipuum in cognitione rerum salubre ac frugiferum, omnium exempli documenta in illustri posita monumento intueri: inde tibi itaque reipublicae, quod imitere, capias: inde, foedum ineptum, sordidum exitu, quod vitas.

(n) Ha-

(n) Hojas eximii viri maxime significavi librum, cui titulus est: *Traité de la Morale des Pères de l'Eglise*, et quem omnibus, ad veram eruditionis laudem aspirantibus, admodum commendatum velim.

(o) Ilac de re POLYBIUS saepius egit. v. c. *Histor. Lib. III. p. 185. A. ed CAS: ἰσορίας γὰρ τὰν ἀφελὴν τίς τὸ διὰ τί, καὶ πῶς, καὶ τίνας χάριν ἰπέραιχθῃ, καὶ τὸ πρῶτον πότερα ἔνλογον ἔσχει τὸ τέλος, τὸ καταλειπόμενον αὐτοῦς, ἀγωνισμα μὲν, μάθημα δὲ οὐ γίγνεται.* Videatur GULDENBERGII *disputatio Philologica de Historicis POLYBII laudibus*. Nobilis est locus CICERONIS de *Orat. Lib. II. cap. 15*, ubi haec ANTONIUS: *Rerum ratio ordinem temporum desiderat, regionum descriptionem: vult etiam, quoniam in rebus magnis memoriaque dignis consilia primum, deinde acta, postea eventus expectantur, et de consillis significari, quid scriptor quomodo: et cum de eventudicatur, ut causae explicentur omnes, vel casus, vel sapientiae, vel temeritatis: hominumque ipsorum non solum res gestae, sed etiam, qui fama ac nomine excellent, de cuiusque vita atque natura.* Sed legatur omnino BORCHII *disputatio de officiis historici in patefaciendis opinionibus &c.*, quae reperitur in *Letteren Oudbeidkundige Verhandelingen van de Hollandsche Maatschappij van Wetenschappen te Haarlem Tom. I. p. 167 s. 1.*

E R R A T A.

- Pag. 1. *Spec-tat.* l. *Spe-ctat.*
 — 4. *Vulgo* l. *vulgo.*
 — 5. *opt. max.* l. *Opt. Max.*
 — 8. *pe-regrin.* l. *per-egrin.*
 — 9. *adla ctisf.* l. *ad lactisf.*
 — 21. *adfrictis*, l. *adfrictis*;
 — 23. *Maximum*, l. *Maximum*



